

編號 1 號

【暗晡頭个海脣】彭瑞珠原作

暗晡頭个海脣，無麼个人，天頂个月光，畏羞个囡在雲背；拘禮个海風，驚生份个吹一陣又恬一陣，出海口个海浪，慢板慢板仔在該激啊激欸¹。無人出入咁个魚市場裡肚，就單淨留等，幾葩仔²孤栖个電火，還過，幾臺仔推啊推欸³个抽風機。

魚市場外背闊闊个停車場這片，擎花擎花仔⁴停等幾臺个自用仔。還毋想睡个駛車仔人，有人帶等罐頭來餵流浪狗，也有人帶等釣槓仔來湊月光釣魚仔。魚市場該片遠遠个停車場邊脣，幾下個越夜越有元氣个後生人，載等掛有大喇叭个音響，同車後斗掇向天、三臺車仔比比企，在該咚滋咚滋⁵尋月光共下跳舞。

右手片个音樂聲撓到吾腳底癢癢，毋過，左手片騎等過个兩臺奧多拜，錫著吾个目光。佢跔等佢兜个身影，行上兩百八十公尺長个笨鯊橋，想去看啊，掛等頭燈个兩個網魚人，係愛網麼个魚仔？月光也勾頭出來咁，一浪一浪仔个水紋，在月光下看到清

清楚楚，一張魚網、兩個網魚人，落網、收網，撈起來个係一網个月光。雖然，連魚屎仔都無，毋過，佢兜還係有講有笑，佢想，佢兜怕係為著愛打嘴鼓來个，網魚仔，單淨係兩同年想在月光下共下掇个理由定定。

橋下个河壩水，也認同吾个想法「係啊，係啊！」緊應緊大聲，佢緊聽緊生趣。毋過，同佢看真來，該「係啊，係啊！」个聲說，怕係河壩水分海浪打轉來，抑係海浪激上河壩水个聲啊！

毋多知仔，就分佢行過笨鯊橋咁。橋這片，日時頭分人箭到轂轂个自行車，這下通棚一列列仔企好、企正，在月光下恬靜。光華華个路燈下，無人上下咁，就單淨看著一隻揸等螺殼个毛蟹，對白沙堆勾頭出來又囡倒轉去，對路脣趟過來又趟倒轉去，自家在月光下搞囡人尋。佢企在路脣，看毛蟹、看流流流流个河壩水，在共樣个月光下，已像分佢看著咁，頭擺，該一大陣笨鯊入港時，客家打漁人佢兜面頂个笑容。

¹ 激啊激欸：音 gieb a gieb e`；液體來回晃動貌。

² 幾葩仔：音 gi` pa` e`；幾盞。

³ 推啊推欸：音 kog a kog e`；此為形容機器轉動的聲音和狀態。

⁴ 擎花擎花仔：音 lo fa` lo fa` e`；稀疏間雜著其他花色的樣子。

⁵ 咚滋咚滋：音 dung` zii` dung` zii`；形容電子音樂的節奏聲。

【芋荷葉个智慧】謝錦綉原作

這幾年長透會在報紙、電視新聞看著，魚仔肚屎留等各種个塑膠絡仔。

現下因為塑膠絡仔便宜又利便，毋管燒个、冷个、冰个，總下用塑膠絡仔裝，無論上山下海，大隻細隻，用過就挑忒¹，大家慣勢恁樣無限制个使用塑膠絡仔。

三不二時看著新聞報導，海鰵死在海脣，研究人員切開厥肚屎，發現海鰵毋係發病死个，係因為食忒多人類擲在大海裡肚个塑膠絡仔，佢無法度消化正死忒个。海鰵歸身仔塑膠粒仔个毒性，其他个海魚乜共樣有，人又捉魚仔來食，這毒性又轉到人類本身來。結果就恁樣輪迴，魚仔源頭減少，大環境污染，人類自家乜係大食物鏈其中之一，健康當然大受影響。

今年正月年過忒，偌對嘉義上來臺北寮一兩個月；吾姊戴新店山頂，有所在好種菜，逐擺有菜好摘，佢就坐車仔拿來分偌。

第一擺拿著佢用紙絡仔裝等个青菜，偌先放冰箱，等到愛煮个時節，正打開紙絡仔來看，啊哦！正知紙絡仔裡肚還用三層芋

荷葉包等，毋係用塑膠絡仔袋。偌就想：「阿姊啊，你正經跣毋著時代咧！這下還有麼儕用芋荷葉包東西？」偌暗暗在該笑阿姊。

無想著，先拿出一種菜食，旨食个菜用原本个芋荷葉包轉去，繼續放冰箱。過兩日菜食忒，去拿第二種菜个時節，打開芋荷葉，包在葉肚个青菜，還本本萋萋！到這下，偌正知芋荷葉恁好用。

這下个時勢，科技進步盡遽，大部分人總係認為新个發明較進步，舊換新，舊東西大家就挑忒。

毋過，毋管新抑舊，大家總愛想較長久、想較遠兜仔，該兜毋會綿、毋會歿个垃圾，緊留緊多，留到最尾，地球總會分垃圾搵忒²；到該央時，人無法度戴地球，後代子孫乜毋知愛歇在哪位正好？

芋荷葉毋單淨做得保存青菜、魚仔、肉，效果乜比塑膠絡仔較好。東西食忒，摺芋荷葉挑忒，佢轉到泥肚，自然綿忒，就會變做肥料養分，全無打爽。芋荷葉無毒性，毋會污染環境，顛倒分地球淨俐，分人類康健，這係頭擺人个智慧，愛記得正好。

¹ 挑忒：音 tiau` ted`；淘汰、丟棄。

² 搵忒：音 eb` ted`；掩埋、埋藏。

【老鼠仔】張捷明原作

老鼠仔有當多種：田鼠、透地鼠、錢鼠、大老鼠、細老鼠……，田鼠在田坵肚絡食，盡好食番薯，當大隻、又有肉，係頭擺人無豬肉食該下，當重要个肉氣來源之一。

再講透地鼠，佢歇在地泥下，盡好打窿，蒔田个水田，在收冬該下種番薯雜作，係有透地鼠，等到交春蒔田，田脣輒常會漏水，穩水田嘅變漏水田。山田个田坎較高，還會慢慢仔崩田坎，就係老古人講个：「大漏漏毋長，細漏漏燥塘。」意思係講，山魚塘係有老鼠窿，大窿漏大水，會緊張，再仰般無閒，乜會跔等抽間去塞起來，毋過，細窿漏細水，無閒个耕種人就會想，一息息仔定定，就無抽無間，想講天光日正來補，結果天光日又毋記得，等到想著，魚塘水早就燥忒咧。

田鼠會爽番薯，人就捉老鼠仔食，算係一報還一報打平過。透地鼠當得人惱，毋過，做得分人想著這句老古人言教子孫，乜算佢還有兜功勞。

另外，還有錢鼠仔，錢鼠仔實在就得人惱，歇在人屋下个圳溝肚、烏疏疏个所在，細細隻無幾兩肉，還一身臭臊拖蟹，係現

代阿姆人盡驚个小動物。毋過，大人乜當生趣，偏偏同佢安名錢鼠仔，怕係講，這家人當有錢，穀倉正會有當多穀分錢鼠仔食，好得人類知好畜貓仔打老鼠，係無，金山銀山就會分佢食空。

毋過，這下天年倒貶，除忒田鼠、透地鼠、錢鼠，還加一種寵物鼠¹。寵物鼠無天敵，連貓仔就毋係佢个對手；今个人畜个貓仔，嘅毋敢打老鼠仔，還較毋敢打寵物鼠，在人个屋下，一片畜老鼠仔服侍佢做阿公，一片又試著對貓仔過意毋得，故所乜用飼料畜貓仔做寵物，毋單淨毋使寵物貓打老鼠，還同老鼠仔放共下，表示貓鼠世紀大和解，人類第一功。毋過，麼人會知貓仔係仰般想个呢？

二十世紀後，除忒寵物鼠，世界又加一種還較新品種个老鼠仔，毋使飼料，毋會屙屎，淨淨俐俐又毋會喬人，日日放在手巴掌惜日惜夜，還做得分人使嘴，佢安到滑鼠。手巴掌捉等厥圓身在桌頂一滑，手指在厥一片耳公一點，就做得指揮電腦，指揮世界，指揮地球，難怪十二生肖，老鼠仔早就打第一，貓仔嘅紙頭無名、紙尾無姓，連同老鼠仔比大細个資格就無。

¹ 寵物鼠：音 cung` vud cu`；人類為了觀賞或趣味而飼養的鼠類。

【網出阿姆个背影】徐薰琪原作

網路就像係一面洋洋洋洋無邊無脣个大海，網等人同人之間个距離、網等世界个脈動、網等日常生活。佢，就像係一尾魚仔，輒常洄入網肚遊遊野野，緊洄緊深、緊洄嘎緊遠……。

還記得讀國中愛開學个前幾日，阿姆拿等一支手機仔講愛分佢用。頭下碼，佢疑狐自家个耳公係毋係有聽差，緊擦等手機仔，歡喜到奈毋得，心肝肚恁想，佢總算乜有一支手機仔哩！正想講愛仰般好好來使用這手機該下，就聽著阿姆講：「分你手機仔，係方便你摺屋下人聯絡事情哦！毋係分你拿來變鬼變怪个，也升國中哩，自家愛曉得自重，敢做得到？」佢跔等點頭講：「阿姆放心啦！佢用手机仔定著會有準則。」

續等幾下日，手機仔裡肚三不二時就跳出遊戲、社交軟體个訊息，「阿姆放心啦！佢用手机仔定著會有準則。」這句話早就變成一陣風，飛到天背遠去哩！

網路世界切斷阿姆摺佢之間个信任，毋多知仔同屋下人講話个時間緊來緊短，同手機仔相處个時間越來越長；搵手做家务个時間緊來緊少，洄落手機个時間越來越多，佢就像今這下个低頭

族共樣，一旦手機仔拿在手頂，愛放下來係無恁該个事情。

記得有一日食飽夜過後，佢堵好摺同學搞等緊張刺激个線上遊戲，阿姆喊佢好去洗碗筷也，佢詐意仔無聽著，過無幾久阿姆又過喊加一擺，佢就謏等應講：「大細心！逐擺就喊佢！屋下淨伸佢一儕人喲？」無想著這句話深深刺入阿姆个心。阿姆聽著過後，就恬恬行入灶下去洗碗。佢看著阿姆洗碗个背影，感覺著頭下對阿姆堵堵撐撐¹嶄然過分，就遽遽放下手機仔同阿姆會失禮，摺阿姆手頂个碗筷接來洗。

該暗晡為著這件事情睡毋落覺，腦膈肚浮出阿姆洗碗个背影，該背影就像係一面鏡仔，照等阿姆腰拊背吊个身影，嘎映出佢無坎無像个態度；照等阿姆對佢个開容笑面，嘎映出佢對阿姆眼眴眴仔个面目。更深夜靜，佢个反省比夜還較長，經過這擺个事件，正意識著佢个日常生活既經分網路世界縐縐，漸漸仔疏離對屋下人个互動。故所，佢想尋轉阿姆對佢个信任，愛自我要求正確來使用手機仔，學校作業定著愛先做忒、家務搵手做忒過後正使用手機仔，還愛記得同屋下人多共下，大家和和接接過日仔該正係盡有溫情个家庭生活。

¹ 堵堵撐撐：音 duˋ duˋ cang cang；頂嘴。